



**Qanoq iliorluni nunatsinni inoqarfiit inuerukkiartortut, inuerukkiartornerisa illuanut saatsinnissaa pillugu apeqquteqaat aallaavigalugu Inatsisartunut oqallisissiaq.**

(Inatsisartunut ilaasortaq Jess Svane, Siumut)

inuit nunaannarmiit illoqarfinnut nussornerat Kalaallit Nunaanniinneq atuunnani aamma nunarsuup sinnerani atuuppoq. Imaluunnit nunaqarfinit illoqarfinnut nussortoqarnera. Ineriartorneq taamaappoq.

Demokraatini paatsuugassaangitsumik isumaqarpugut inuit tamarmik sumi najugaqarusunnerlutik nammineq aalajangertassagaat. Namminersorlutik Oqartussaniit oqaluttuussissanngilagut inuit sumi najugaqartariaqarnersut. Uangut politikerit suliasaraarput kusanartunik sinaakkusiussallugu nunarput qanoq pitsaanerpaamik ineriartussanersoq. Paarlattuanik suliasarinngilarput innuttaasunik immikkoortitsinissarput tunngavigalugu innuttaasut sumi najugaqarusunnersut.

Inatsisartunut ilaasortap Jess Svanep uani eqqarsaasorsorfigaa nunaqarfinni isorliunerusuniluunniit najugaqarneq qanoq pilerinarsarneqarsinnaanersoq,. Assersuutigalugu siunnersuutigaa nunaqarfimmi isorliunerusuniluunniit najugaqarneq akileraarutit aqqtugalugit pilerinarsarneqarsinnaasoq. Tamannali ajornartorsiutinik assigiinngitsunik nassataqartussaavoq. Demokraatini nuannarinngilarput sumiiffimmi aalajangersimasuni najugaqarusuttut akilerneqartalernissaat. Aningaasat atorusunneruagut inunnut sulerusuttunut ajunngitsorsiasatut soorlu sulinnermut ilanngaammik pilersitsinikkut. Tamatuma saniatigut aamma ajornartorsiutaavoq Inatsisartunut ilaasortap erfattuliornera. Akileraarutitigut ilanngaatiq qanoq angitiginissaa takorloorneqarpa? Qanoq akeqassavara taamatut aqqissuussineq?

Demokraatini oqareernitsitut isumaqarpugut Namminersorlutik Oqartussat ineriartorneq innuttaasut namminneq pilersitaat akiussanngikkaat. Kinaluunniit pinngitsaaliissummik nuutinneqassanngilaq tamannalu atuuttuassaaq.

Innuttaasut nammineq aalajangersinnaasariaqarpaat sumi najugaqarusunnerlutik. Politikerit tamanna akuliuffigisussaannngilaat.

Tamakkuugallarput Demokraatini oqallinnermi oqaatigerusutagut.



DEMOKRAATIT  
DEMOKRATERNE